

Euskal Liburu eta Diskoen Durangoko 25. Azoka



Azokak Uribarri kalean du sarrera. Barnean, aurrez aurre egongo dira liburuaren standak eta ezkerreko areto luzean diskoenak.

I. MARTIARENA

Durangoko Azokaren zilarrezko urtea

Laurogeitabat argitaldari ehun eta hogeitasei stand-etan egokiturik

Gederiaga Elkartek antolatzen duen Euskal Liburu eta Diskoen Durangoko Azokak 25. edizioa betetzen du aurten. Aurtengo ekoizpenen erakusketaz gainera, bertso txapelketak eta Lete, Valverde eta Lertxundiren kantaldiak hartuko dute lekuri nabarmenena.

GORKA ARRESE / DONOSTIA

Gaur hasi eta datorren igandera bitartean zabalik izango ditu ateak Durangoko 25. Azokak. Urtero bezala, euskal liburuaren argitaletxe eta diskoetxe guztiek euren standak izango dituzte azken aldiko ekoizpen be-

rriak erakusteko, orotara laurogeitabat argitaldari ehun eta hogeitasei standetan egokiturik.

Azokak dirauen lau egunetan goizeko 10'30etatik eguerdiko 14'00etara eta arratsaldeko 16'30etatik iluntzeko 21'00etara bitartean zabalik egongo dira ateak euskal liburu eta disko berriak ikusi edo erosi nahi dituenarentzat.

Sarrera hitzaldia Henriette Aire, Urepelen jaio eta Baionan bizi den idazleak egingo du gaur arratsaldeko 6'30etan.

Gederiaga Elkartek atondutako hogeitabostgarren edizio honekin zilarrezko urtea betetzen delarik, urtemuga ospatzeko ekitaldi bereziak iragarri dituzte antolatzaileek: Antton Valverde eta Xabier Leteren ar-

teko kantaldia (abenduak 7) edota Araba eta Bizkaiko Bertsolari Txapelketako bigarren finalaurrea (abenduak 9).

✓ **Elkar argitaldaria eta IZ diskoetxeak izango dute stand kopururik handiena, Zabaltzen distributzailearekin batera.**

Elkar liburu argitaldaria eta diskoetxea, IZ diskoetxea eta Zabaltzen distributzailea dira aurten ere standik gehien ipiniko dituztenak. Ondoren Erein, Lur, Arabako Foru Aldundia

eta Bilbo Bizkaia Kutxa. Sarrera hitzaldiaz aparte, gaurko egitarauak disko aurkezpen bakar bat baino ez du izango, arratsaldeko 21'00etan Ezkurdiko Jai Alai pilotalekuan Gontzal Mendibil eta Kepa Junkerak egingo dutena. Mendibilek 'Zu zeu' diskoa aurkeztuko du eta Junkerak 'Triki up', biak IZ diskoetxearekin plazaratuak.

LITERATUR LIBURU GUTXI Euskal liburutegintzaren Durangoko eskapate honetan, kopurutan, testu liburuak izango dira nagusi ohizkoa den legez, eskola eta unibertsitate ikasketetara zuzenduak bati-pat. Hala ere protagonista nabarmenak haur literatura eta helduen literatura argitalpen berriak izaten

dira. Aurten ordea, helduen literatura zaleek ez dute aurreko urteetako nobedade gosea ase ahal izango, idazle ospetsuen liburu berri gutxi bait dago.

Sendoa etxeak literatura sailari ekin diola da notiziaren nagusia, Patxi Ezkiagaren nobela ('Charles Moulay') eta ipuinekin. Elkarrek ere badakar sail berriak, Branka, Sarri-nandiaren gazteentzako liburu batekin ('Ainhoa gutunak'), eta gainera Andoni Egañaren artikulua bilduma.

Ereinek bi elaberri aurkeztuko ditu: Joxe Belmonteren 'Ez dira ilunak' eta Rafa Egigurenen 'Ilargia putzuan'. Susak bi narrazio liburu agertuko ditu: Edorta Jimenezen 'Atoizuntzia' eta Pablo Sastrenen 'Kristalezko bularrak'.

Gaurko ekitaldiak

abenduak 6, osteguna:

Sarrera hitzaldia.....	Azokaren aretoan
Henriette Aire	18.30
Kantaldia	Ezkurdiko Jai Alai Pilotalekuan
Gontzal Mendibil eta Kepa Junkera	21'00

Biharko ekitaldiak

abenduak 7, ostirala

Mahai ingurua.....	Azokaren aretoa
Henriette Aire	19.00
Edorta Jimenez	
Felipe Juaristi	
Juan Mari Lekuona	
Luzien Etxezaharreta	
Kantaldia	Kurutziaga zinema
Xabier Lete eta Antton Valverde	22.00



Henriette Aire.

P. URZELAI

Olerki unibertsalari buruzko gogoetak

Henriette Airek olerki unibertsalari buruzko bere gogoetak azalduko ditu gaur 'Olerkaritza' izenburupean eskainiko duen sarrera hitzaldian, egungo gizarte moderno eta teknologikoan poesiak izan dezakeen zereginari begira batez ere. Era teknologikoari lotutako bizimodu berriak gauza asko galbidean jarriko baditu ere, «olerkiak zerbait salbatzeko aukera emango digula» uste du Urepelen jaiotako idazleak.

Poesiak badu, beraz, zereginik gizarte modernoan, eta poesiaren alde jokatu beharra aldarrikatuko du Airek.

Bere kasa egindako gogoetak izango dira Airek eskainiko dituenak, «literatur teoriaren berri handirik ez duen poeta batek eginak», EGUNKARIARI adierazi dionez.

Henriette Aire Baionan bizi da. Maiatz aldizkari eta argitaletxearen inguruko taldearen partaide da eta poema liburu bat du kaleratua argitaletxe horretan: 'Egiaren egarritz'. Maiatz aldizkarian argitaratutako bere poemak irakurriko ditu etzi, Pello Zabaleta, Eskarne Aroma eta Jesus Eguzkitzarekin batera egingo duen olerki errezitalean.